

POPERA GA EPÉCHIUWA YEXMAGÜXŨ GA YAXÖGÜXŨTANÜWA NAMUXŨ GA PAURU

**Pauru rü nüxŭ narümoxe ga yema
yaxögüxŭ ga Epéchiuarü iānewa
yexmagüxŭ**

1 ¹Pa Chaueneëgü ya Epéchiuwa
Ngëxmagüxe, choma i Pauru nixĩ i
pexçax chanaxümatüxŭ i ñaã popera.
Rü choma i Pauru chixĩ i Tupana choxŭ
yaxuxŭ na Ngechuchu ya Cristu choxŭ
muxŭçax na duüxŭgümaã nüxŭ
chixuxŭçax i norü ore. Rü pexçax
chanaxümatü i guxāma i pema ya
Epéchiuarü iānewa ngëxmagüxe rü
Tupanaärü duüxŭgü ixigüxe rü
Ngechuchu ya Cristuaxŭ yaxögüxe. ²Rü
chanaxwaxe i pexŭ narüngüxëe rü pexŭ
nataëxëe ya Tanatü ya Tupana rü törü
Cori ya Ngechuchu ya Cristu.

**Tupana rü poraäcü tüxŭ narüngüxëe erü
Cristuarü duüxŭgü tixigü**

³Rü name nixĩ i nüxŭ ticuaxŭgü ya
Tanatü ya Tupana ya törü Cori ya
Ngechuchu ya Cristunatü. Rü name nixĩ
i ngëmaäcü tanaxü erü ñuxma na
Cristuarü duüxŭgü ixigüxŭ, rü nüma ya
Tupana rü daxŭwa taxçax ne nanamu i

nagüxŭraüxŭ i ngüxëe i Naãe i
Üünexŭwa ne ixŭ i törü maxŭçax ixixŭ.
⁴⁻⁵Rü tautama naãne üxgu, rü
Cristugagu Tupana tüxŭ nidexechi na
napexewa ixüünegüxŭçax rü na
nataxuxŭçax i törü chixexŭ i napexewa.
Rü Tupana rü poraäcü tüxŭ nangechaŭ.
Rü yemaçax nuxçumamatama tüxŭ
naxuneta na naxäcügüxŭ tüxŭ
nadexŭçax Ngechuchugagu. Rü
yemaäcü nanaxü yerü yema nixĩ ga
norü ngüchaŭ. ⁶Rü ngëmaçax name nixĩ
i guxŭguma nüxŭ ticuaxŭgü ya
Tupana. Erü nüma rü poraäcüxüchima
tamaã namecüma rü poraäcü tüxŭ
narüngüxëe ga yexguma taxçax núma
namuaxgu ga Nane ya nüxŭ
nangechaüxŭchicü. ⁷Rü Tupana rü
poraäcü tüxŭ nangechaŭ, rü yemaçax
nanamu ga Nane na taxçax nayuxŭ rü
nagü inabaxŭ na yemaäcü tüxŭ
ínanguxŭxëeüçax rü tüxŭ nüxŭ
nangechaüxŭçax ga törü pecadugü. ⁸Rü
Tupana tüxŭ nüxŭ nadauxëe na ñuxäcü
poraäcü tüxŭ nangechaüxŭ ga yexguma
tüxna naxäaxgu ga guxŭma ga törü cuax
na taäxŭ icuaxŭçax rü tüxŭ

natauxchaxūcax i norū ore. ⁹Rū tūxū nūxū nacuaxēē ga norū ngúchaū ga noxri nūxīcatama nūxū nacuáxū. Rū yema norū ngúchaū ga nuxcūmaxūchima Cristumaā nagu naxīnūxū ga Tupana, rū yema nixī ga ñoma ga naānewa na namuāxū na tūxū yamaxēēxūcax. ¹⁰Rū yema nagu naxīnūxū nixī na Cristumexēwa nangēxmaxēēxū i guxūma i daxūguxū i naānewa ngēxmaxū rū guxūma i ñoma i naānewa ngēxmaxū. Rū ngēmaācū tá nanaxū ya Tupana i ngēxguma nawa nanguxgu na yanguxēēxū. ¹¹Yerū nuxcūmamata Tupana toxū nidexechi na Cristugagu tanayauxgūxūcax i ngēma maxū i taguma gūxū i nūma toxna naxāxchaūxū. Rū aixcūma yemaācū toxū narūngūxēē yerū yema nixī ga norū ngúchaū ga Tupana ya guxūma ūcū, ngēma nūma nagu naxīnūxūācūma. ¹²Rū yemaācū Tupana toxū nidexechi na naxcax tamaxēxūcax rū nūxū ticuaxūūgūxūcax naxcax na tomaā namecūmaxū i toma i toxira Cristuaxū na tayaxōgūxū. ¹³Rū yexgumarūū ta ga pema i Epéchiucūāxgū, rū yexguma nūxū pexīnūēgu ga yema ore i aixcūma ixīxū i tūxū maxēxēēxū, rū yexguma Cristuaxū peyaxōgūgu, rū natanūxūgū pixīgū. Rū Tupana ga tamaā ixunetacū na tūxna namuāxūcax i Naāē i Ūūnexū, rū marū pexna nanamu i ngēma Naāē na nūxū pecuáxūcax na aixcūma norū duūxūgū pixīgūxū. ¹⁴Rū nūma ga Tupana nūma nanamu ga Naāē i Ūūnexū na nawa nūxū icuáxūcax na aixcūma tá tūxna naxāāxū i guxūma ga yema tamaā inaxunetaxū. Rū yixema na

noxrū ixīgūxū rū tá aixcūma tanayaxu i guxūma i ngēma tamaā inaxunetaxū i ngēxguma wena nūma naxūxgu na pecaduwa tūxū íyanguxūxēēxūchixūcax. Rū ngēmacax name nixī na nūxū icuaxūūgūxū ya Tanatū ya Tupana ya mexēchicū.

Pauru rū Tupanana naxcax naca na yema yaxōgūxūna naxāāxūcax ga cuax

¹⁵⁻¹⁶Rū ngēmacax, űuxma na nūxū chacuáxū na aixcūma tórū Cori ya Ngechuchuaxū peyaxōgūxū rū na aixcūma nūxū pengechaūgūxū i guxūma i ngēma togū i Tupanaārū ixīgūxū, rū ngēmacax taguma nūxū charūchau na pexcax moxē nūxna chaxāxū rū pexna chacuaxāchixū i chorū yumūxēwa. ¹⁷Rū ngēxguma namaā chideaxgu ya Tanatū ya Tupana ya mexēchicū ya Nanatū ya tórū Cori ya Ngechuchu ya Cristu, rū naxcax nūxna chaca na pexna naxāāxūcax i ngēma cuax i Naāē i Ūūnexūwa ne ūxū. Rū ngēma Naāē i Ūūnexū tá nixī i pexcax nangoxēēxū i Tupanaārū ore i mexū na yexeraācū nūxū pecuáxūcax ya Tupana. ¹⁸Rū Tupanana naxcax chaca na nūmatama pexū yangoxnaāēxēēxūcax, na nūxū pecuáxūcax na tacū yīxū i ngēma ípenanguxēēxū i naxcax pexū yadexechixū. Rū nūxna naxcax chaca na pexū nūxū nacuaxēēxūcax na űuxācū namexēchixū i ngēma maxū i taguma gūxū i nūma norū duūxūgūcax namexēēxū i daxūguxū i naānewa. ¹⁹⁻²⁰Rū ngēxgumarūū ta rū nūxna naxcax chaca na pexū nūxū nacuaxēēxūcax na űuxācū nataxūchixū i norū pora i tawa ngēxmaxū rū namaā

tüxũ nangũxẽxũ i yixema na yaxõgũxũ. Rü ngẽmatama pora i taxũmaã nixĩ ga napuracũxũ ga Tupana ga yexguma yuwa Cristuxũ ínadxẽẽgu rü daxũguxũ ga naãnewa nagaãxgu rü nügiarü tügüncüwawa yanatoxẽẽagu na guxãarü ãëxgacü yĩxũcax. ²¹Rü yemaãcü guxũétüwa nanayexmaxẽẽ. Rü ngẽmacax i ñuxma rü Cristumẽxẽwa nangẽxmagü i guxũma i daxũguxũ i naãnecũãx i ãëxgacügü rü guxũma i ñoma i naãnecũãx i ãëxgacügü. Rü ngẽmaãcü naxmẽxwa nangẽxmagü i guxũma i pora i ñuxma ngẽxmagũxũ rü guxũma i pora i tá ngẽxmagũxũ. Rü ngẽmaãcü i nũma rü guxũ i ãëxgacügüarü ãëxgacü tá nixĩ i guxũguma. ²²Rü yemaãcü ga Tupana rü marü Cristumẽxẽwa nanayexmagũxẽẽ ga guxũma. Rü yexgumarũü ta Cristuxũ ningucuchixẽẽ na guxũma i yaxõgũxũeru na yĩxũcax. ²³Rü ñuxma rü guxũma i yaxõgũxũ rü wũxigu Cristuarü nixĩgü. Rü nũma nixĩ i tawa nangẽxmaxũ i guxãma i yixema i nüxũ na yaxõgũxũ. Rü ngẽxgumarũü ta nũma nixĩ i nangẽxmaxẽẽxũ i guxũma i tacü i ngẽxmaxũ i guxũwama.

Tamaxẽ erü Tupana tüxũ nangechaũ

2 ¹Rü ũpa ga pema rü perü pecadugagu rü perü chixexũgagu ñoma peyuxẽrũü pixĩgü. ²Yerü ga pema rü nagu pexĩ ga yema chixexũ i ñoma i naãnecũãx i duũxũgü nagu ãxũ. Rü pema rü naga pexĩnüẽ ga Chataná i ngoxogüarü ãëxgacü ixĩxũ. Rü nũma nixĩ i nüxũ nangúchaũxẽẽxũ na chixexũ naxũgũxũcax i guxũma i ngẽma duũxũgü i tama Tupanaga ñnũxũ. ³Rü

guxãma ga yixema rü yemaãcü chixri tamaxẽ ga ũpa. Rü tanaxü ga tóxrütama ngúchaũ, rü nagu taxĩ ga yema taxüne naxwaxexũ rü yema taãẽ naxwaxexũ. Rü yemagagu yema togü ga duũxũgü ga chixexũ ügũxũrũü nawa taxügü i ngẽma poxcu i ãücũmaxũchixũ i Tupana mexẽẽxũ. ⁴Natürü ga Tupana rü poraãcü nüxũ tangechaũtümũgü rü poraãcü tüxũ nangechaũ. ⁵Rü yemacax, woo tóru pecadugagu ñoma iyuxẽrũü tixĩgü, natürü ga Tupana rü Cristuxũ ínadxẽẽxũgagu tüxũ namaxẽxẽẽ. Rü ñuxma rü pexũ nangẽxma i maxũ i taguma gúxũ, erü Tupana pemaã namecũma. ⁶Rü yema na Ngechuchu ya Cristuxũ wena namaxẽẽxũrũü rü tüxũ rü ta namaxẽxẽẽ ga Tupana. Rü yemaãcü nanaxü na yixema rü ta Cristumücügü ixĩgũxũcax, rü namaã ãëxgacügü ixĩgũxũcax i daxũguxũ i naãnewa. ⁷Rü yemaãcü nanaxü ga Tupana na guxũgutáma duũxũgũxũ nawéaxũcax na ñuxãcü Cristugagu poraãcü tüxũ nangechaũxũ rü tamaã namecũmaxũ. ⁸Rü yemaãcü pemaã namecũma ga Tupana. Rü yemacax penayaxu ga maxũ i taguma gúxũ yerü peyaxõgü. Rü ngẽma maxũ rü taxucürüwama pegünatama penaxã, natürü Tupana nixĩ ga pexna naxãmarecü ga yema. ⁹Rü tama tacü i mexũ i pexũxũcax nixĩ i pexũ nangẽxmaxũ i ngẽma maxũ, natürü Tupana nixĩ ya pexna naxãmarecü na ngẽmaãcü taxúema tügü icuaxũxũcax. ¹⁰Rü Tupana nixĩ ga tüxũ maxẽxẽẽcü. Rü ñuxma rü tüxũ nangẽxma i ngẽma maxũ yerü Ngechuchu ya Cristu tóru pecaducax nayu. Rü Tupana tüxna nanaxã i ngẽma

maxĩ na meã imaxẽxũcax rĩ mexũ
ixĩgũxũcax. Rĩ yemaãcũ tũxũ
narũngũxẽẽ ga Tupana yerũ woetama
nuxcũmaxũchima marũ yemagu
narũxinũ.

Cristu nixĩ ya tũxũ rĩngũxmũẽxẽcũ

¹¹⁻¹²Rĩ ngẽmacax i pema na tama
Yudĩgũ pixĩgũxũ, rĩ name nixĩ i nũxna
pecuaxãchie na tama toxrũ na
pixĩgũxũ ga noxri rĩ tama Tupanaxũ na
pecuaxgũxũ. Rĩ yema na tama toxrũ
pixĩgũxũ rĩ yemacax ga toma ga
Yudĩgũ i togũ na
ĩtawiechaxmũpexechiraũgũxũ, rĩ nũxũ
tixugũe na pema rĩ tama
Tupanapexewa na pimexũ yerũ tama
toxrũ pegũ
ĩpewiechaxmũpexechiraũgũ. Rĩ
yexguma ga pema rĩ tama Cristuxũ
pecuaxgũ, yerũ tama Tupanaãrũ
duũxũgũ i Yudĩgũtanũxũ pixĩgũ. Rĩ
tama nũxũ pecuaxgũ ga Tupana nũma
na namuxũ ga Nane na duũxũgũarũ
pecaducax nayuxũcax na nũxna
naxãxũcax i maxũ i taguma gũxũ. Rĩ
woo ga yema mexũgũ ga Yudĩgũmã
inaxunetaxũ ga Tupana, rĩ taxucũrũwa
penayaxu. Yerũ ñoma ga naãnewa rĩ
pemaxẽmare, rĩ tama nũxũ pecuax ga
ťacũ chi pexũ na ũpetũxũ ga yexguma
chi peyuegu yerũ tama Tupanaxũ
pecuax. ¹³Natũrũ woo ga noxri rĩ tama
Tupanaxũ na pecuaxũ, natũrũ i ñuxma
rĩ nũgũxũtawã pexũ nagagũ. Rĩ
Ngechuchu ya Cristuarũ duũxũgũ pixĩgũ
yerũ pexcax nayu rĩ nagũ inanaba.
¹⁴⁻¹⁵Rĩ ñuxma rĩ Cristu nixĩ ya tũxũ
rĩngũxmũẽxẽcũ. Rĩ noxri ga toma ga
Yudĩgũ rĩ pexchi taxaie yerũ tama

toxrũ Yudĩgũ pixĩgũ. Natũrũ i ñuxma
rĩ Cristu marũ yigũmã tũxũ
narũngũxmũẽxẽ. Rĩ yemaãcũ
wũxitama i duũxũgũxũ tũxũ nixĩgũxẽ
rĩ inayanaxoxẽ na yigũarũ uwanũ
ixĩgũxũ. Rĩ yexguma nayuxgu ga Cristu
rĩ tũxũ ĩnanguxũxẽ na tama natũũwa
iyexmagũxũcax ga yema nuxcũmaũgũxũ
ga mugũ ga toma ga Yudĩgũ nagu
taxĩxũ. Rĩ wũxitama i duũxũgũ i
ngexwacaxũxũ tũxũ nixĩgũxẽ i toma i
Yudĩgũ na tixĩgũxũ rĩ pema i tama
Yudĩgũ na pixĩgũxũ. Rĩ yemaãcũ
nanaxũ na guxãma i yixema rĩ norũ
duũxũgũ na ixĩgũxũcax. Rĩ yemaãcũ
yigũmã tũxũ ĩnarũngũxmũẽxẽ. ¹⁶Rĩ
yexguma curuchagu nayuxgu ga Cristu,
rĩ inayanaxoxẽ ga yigũchi na ĩxaĩexũ.
Rĩ yemaãcũ ga Cristu rĩ Tupanamaã
tũxũ ĩnarũngũx-mũẽxẽ, rĩ wũxitama i
duũxũgũxũ tũxũ nixĩgũxẽ. ¹⁷Rĩ
yexguma Cristu nũma ũxgu, rĩ taxcax
nũma nanange ga ore ga mexũ ga marũ
yigũmã rĩ Tupanamaã na
rĩngũxmũẽxũ. Rĩ yema ore rĩ toxcax
nixĩ i toma i Yudĩgũ ga toxira
Tupanaxũ na tacuaxũ. Rĩ yema ore rĩ
pexcax rĩ ta nixĩ ga woo tama
Tupanaxũ na pecuaxgũxũ ga noxrix.
¹⁸Rĩ ñuxma rĩ guxãma i yixema rĩ
Cristugagu tũxũ natauxcha na Tanatũ ya
Tupanana ĩngaĩcamagũxũ. Rĩ
ngẽmatama Naãe i ũĩnexũ nixĩ i tũxũ
rĩngũxẽxũ na nũxna
ĩngaĩcamagũxũcax ya Tanatũ ya
Tupana. ¹⁹Rĩ ngẽmacax i pema rĩ woo
tama Tupanaxũ pecuaxgũ ga noxrix, rĩ
woo tama norũ duũxũgũ pixĩgũ ga
yexguma, natũrũ tama ngẽmaãcũ pixĩgũ
i ñuxmax. Erũ ñuxma rĩ natanũxũ

pixīgü i guxūma i ngēma duūxūgü i Tupanaārü ixīgūxū. Rü aixcūma Tupanaxācügūxūchi pixīgü i ñuxmax.²⁰⁻²²Guxāma i pema rü wūxi ya ĩpata ya mexūne ya Tupana nawa maxūne pixīgü. Rü ngēma cementu i ladriyu naētūgu nugūxū, rü ngēma rü Tupanaārü ngūexūgü ga imugūxū rü norü orearü uruūgü nixī. Rü yima ladriyu ya nūxirama cementuētūwa ixūcuchicü rü Cristu nixī. Rü ngēma inanaxūgü na naxūāxū ya guxūnema ya yima ĩ. Rü dūxwa ningu na wūxi ya tupauca ya taxūne ya Cristugagu ūūnene na yīxū. Rü ngēmaācū i pema na Cristuarü pixīgūxū rü wūxigu tomaā peyanguxēē ya wūxi ya tupauca ya taxūne i ngextā Tupanaāē i Ūūnexū ĩmaxūxūwa.

Tupana rü Pauruxū namu na ore i mexūxū yaxuxū namaā ga yema duūxūgü ga tama Yudiūgü ixīgūxū

3¹Rü ñuxma na yemaācū Tupana pexū rūngūxēēxū, rü choma i Pauru rü pexcax chayumūxē. Rü pemaā nūxū chixu rü nūma poxcupataūwa changēxma erü Ngechuchu ya Cristuarü duūxū chixī. Rü nuxma chapoxcu erü guxūwama nūxū chixuchiga na pema rü ta pexū nangēxmaxū i pechica i Tupanaxūtawa woo na tama Yudiūgü pixīgūxū.²Rü maneca marü nūxū pecuāchiga na ñuxācū Tupana choxū nangechaūācūma choxū muxū na pexū charūngūxēēxūcax rü pemaā nūxū chixuxūcax i norü ore i mexū.³Rü Tupana chomaā nanangoxēē rü choxū nūxū nacuxēē ga yema ore ga pechiga ga noxri nūxīcatama nūxū nacūāxū. Rü yemachiga nixī ga ĩrarūwa marü pexcax

chanaxūmatixū ga noxrix.⁴Rü yexguma pexcax chanaxūmatūgu rü pemaā nūxū chixu ga yema noxri ēxūgūxū ga ore i ñuxācū Tupana rü Cristugagu duūxūgūxū namaxēēēxū. Rü ngēxguma meā nawa pengūegu i ngēma popera rü tá nūxū pecuax na aixcūma yīxū ga yema ore ga noxri ēxūgūxū ga nachiga pexcax chaxūmatixū.⁵Rü yema nixī ga ore ga ēxūgūxū ga Tupana taxūexūma meā nūxū nacuxēēxū ga noxrix. Natürü i ñuxma rü ngēma Naāē i Ūūnexū rü marü nanangoxēē i ngēma ore naxcax i Tupanaārü duūxūgü i ūūnexū i yamugūxū rü norü orearü uruūgü.⁶Rü ñuxma rü tá pemaā nūxū chixu i ñuxācū na yīxū i ngēma ore ga noxri ēxūgūxū. Rü dūcax, woo tama Yudiūgü pixīgü natürü i ñuxma rü pexcax rü ta nixī i ngēma maxū i taguma gūxū ga noxri Tupana tomaā ixunetaxū. Rü ñuxma i pema rü ta norü duūxūgü pixīgü. Rü pexcax nixī i guxūma i ngēma Tupanaārü unetagü ga noxri tomaā nūxū yaxuxū. Rü ngēmaācū i ñuxma rü Ngechuchu ya Cristugagu pexū nangēxma i guxūma i ngēma mexūgü erü peyaxōgü i norü ore i tūxū maxēēēxū.⁷Rü woo taxuwama chame na chanaxūxūcax i norü puracū, natürü ya Tupana rü choxū namuāma rü choxū naporaxēē na nūxū chixuxūcax i ngēma norü ore i mexū.⁸Rü chaugūcax i Tupanapexewa rü choma nixī i guxū i norü duūxūgūarü ñaxtūwaama chaxūxū. Rü woo ngēmaācū chixī, natürü Tupana choxū nangechaū rü choxna nanaxā i ngēma puracū i mexū na ngēma tama Yudiūgü ixīgūxemaā nūxū na chixuxūcax i norü ore i mexū na ñuxācū namexēchixū rü taguma iyagūxū ga yema taxcax naxūxū ga Cristu.⁹Rü nūma ga

Tupana ya guxũãrũ üruũ ixĩcũ, rü choxũ namu na guxũ i duũxũgũxũ nüxũ chacuãxẽẽxũcax na ñuxãcũ yĩxũ i ngẽma norũ ngúchaũ ga nuxcũma ẽxũguxũ ga noxri nüxĩcatama nüxũ nacuáxũ. Rü ngẽma norũ ngúchaũ nixĩ i Cristugagu tüxũ na namaxẽẽxũ. ¹⁰Rü yemaãcũ choxũ namu ga Tupana na ngẽma duũxũgũ i tama Yudũgũ ixĩgũxũmaã nüxũ chixuxũcax i ore i mexũ na yaxõgũãxũcax. Rü nüma ya Tupana nanaxwaxe na yaxõgũãxũ na ngẽmaãcũ guxũma i ãẽxgacũgũ i daxũcũãx nüxũ nadaugũxũcax na ñuxãcũ nüxũ nacuãxũchixũ ga Tupana ga yexguma duũxũgũãxũ natauxchaxẽẽãgu na naxũtawa nangugũxũcax. ¹¹Rü yemaãcũ nüxũ nanatauxchaxẽẽ ga Tupana yerũ woetama nuxcũmaxũchima guxũguma nagu narũxinũ na tórũ Cori ya Ngechuchu ya Cristugagu tá na namaxẽẽãxũ i duũxũgũ. Rü yemaãcũ nayanguxẽẽ. ¹²Rü ñuxma na Cristuarũ duũxũgũ ixĩgũxũ rü nüxũ na yaxõgũxũ, rü tüxũ natauxcha na Tupanana ingaicamagũxũ rü taxucaxma nüxũ na imuũẽxũ. ¹³Rü ngẽmacax i ñuxma na pexcax ngúxũ chingexũ rü pexũ chacaxũ na tama chauxcax pexoegaãẽgũxũcax. Erũ ngẽma ngúxũ na chingexũ i ñuxma rü perũ meruũ nixĩ i ngẽma.

Cristu rü poraãcũ tüxũ nangechaũ

¹⁴Rü ngẽmacax, ngẽxguma nagu charũxinũgu na ñuxãcũ Tanatũ ya Tupana taxcax namexẽẽxũ na naxãcũgũ ixĩgũxũcax, rü napexegu chacaxápxũ na nüxũ chicuãxũxũcax. ¹⁵Rü nüma nixĩ i Nanatũ yĩxũ i guxũma i norũ duũxũgũ i ñoma i naãnewa rü daxũguxũ i naãnewa ngẽmagũxũ. ¹⁶Rü Tanatũ ya

guxũguma poraãcũ tamaã mecũmacũna chaca na Naãẽ i Üünexũãrũ ngũxẽẽmaã pexũ naporaexẽẽxũcax na aixcũma peporaexũcax i perũ maxũwa. ¹⁷⁻¹⁸Rü ngẽxgumarũ ta nüxna naxcax chaca na perũ õgagu pewa namaxũxũcax ya Cristu. Rü ngẽxguma ngẽmaãcũ perũ maxũwa peporaegu rü pexũ nangẽxmagu i ngẽma ngechaũ i aixcũma ixĩxũ, rü tá wũxigu guxũma i yaxõgũxũmaã nüxũ pecuãx na ñuxãcũ nataxũchixũ i norũ ngechaũ i namaã tüxũ nangechaũxũ ya Cristu. ¹⁹Rü woo tama yanguxgu i tórũ cuãx na nüxũ icuãxũcax na nañuxraũxũ i ngẽma ngechaũ i namaã Cristu tüxũ ngechaũxũ, natürũ Tupanana naxcax chaca na pexcax nangoxẽẽãxũcax na ñuxãcũ na yĩxũ i ngẽma ngechaũ na aixcũma pewa nangẽxmaxũ i guxũma i Tupanacũmagũ. ²⁰Rü ñuxma rü name nixĩ i guxãma i yixema rü nüxũ ticuãxũgũ ya Tupana. Erũ nüma rü nüxũ nangẽxma i pora na naxũãxũ i guxũma i ngẽma naxcax ícaxũ rü ẽxna nagu rüxinũẽxũãrũ yexeraxũchi. Rü ngẽma norũ pora i tawa ngẽxmaxũmaã nixĩ i naxũãxũ i guxũma i ngẽma. ²¹Rü ñuxma rü name nixĩ i guxũma i norũ duũxũgũ i yaxõgũxũ rü guxũgutáma Tupanaxũ nicuãxũgũ naxcax i ngẽma Ngechuchu ya Cristu üxũ. Rü ngẽmaãcũ yĩĩ.

Tupanaãẽ i Üünexũ rü wũxigutama tüxũ narũxinũẽxẽẽ

4 ¹Rü ñuxma na ngẽmaãcũ Tupana tüxũ rüngũxẽẽxũ, rü choma i Cristugagu na chapoxcuxũ, rü pexũ chacaxũ na Tupana naxwaxexũãcũma

meã pemaxëxũ. Rũ name nixĩ i ngẽmaãcũ pemaxë erũ pexũ nixĩ ga yadexechixũ ga Tupana, rũ norũ duũxũgũ pixĩgũ i ñuxmax. ²Rũ chanaxwaxe i pegũ íperũxĩragũ rũ tama pegũ picuaxũgũ. Rũ name nixĩ i meã togũ i duũxũgũxũ peyaxu rũ namaã pemecũmagũ rũ yaxna namaã pexĩnũ. Rũ name nixĩ i pegũ pengechaũãcũma pegũ perũngũxëëgũ. ³Rũ ñuxma rũ wũxigu perũxĩnũ rũ ñoma wũxitama i duũxũrũũ pixĩgũ erũ pewa nangẽxma i Tupanaã i Üünexũ. Rũ name nixĩ i naxçax pedau na guxũguma ngẽmaãcũ meã pegũmaã pemaxëxũ rũ pegũ pengechaũgũxũ na taguma ñacũçax na pegũ pitoyexũ. ⁴Erũ yixema na Cristuarũ duũxũgũ ixĩgũxũ, rũ ñoma wũxitama i duũxũrũũ tixĩgũ. Rũ ngẽxgumarũũ ta wũxitama nixĩ i Naã i Üünexũ i guxãwama maxũxũ. Rũ ngẽxgumarũũ ta Tupana pexũ nidexechi na guxãma ípenangũxëëgũxũçax i wũxitama i maxũ i taguma gũxũ. ⁵Rũ wũxitama nixĩ ya tórũ Cori, rũ wũxiaxũtama nixĩ i yaxõgũxũ rũ wũxiçaxicatama nixĩ ga íibaiũxũ ga guxãma. ⁶Rũ wũxitama nixĩ ya Tupana ya guxãnatũ ixĩcũ. Rũ nũma rũ guxãëtũwama nangẽxma rũ guxãwama namaxũ. Rũ nũma rũ guxãxũ narũngũxëë na tanaxũxũçax i norũ puracũ. ⁷Natũrũ wũxichigũ i yixema rũ tanayaxu i ngẽma nacũma rũ ngẽma cuax i Cristu tũxna ãmarechaũxũ na naxũgũxũçax i norũ puracũ. ⁸Rũ ngẽmacax i Tupanaãrũ ore i ñumatũxũwa rũ ñanagũrũ:

“Rũ yexguma daxũgũxũ ga naãnewa naxũxgu, rũ yẽma tũxũ nagagũ

ga guxema marũ nũma tũxũ nayexeraxe. Rũ norũ duũxũgũna nanaxã ga nacũma i mexũ”,

ñanagũrũ i ngẽma orewa. ⁹Rũ ñuxma Pa Chaueneëgũx, rũ pexna chaca, rũ ñacũchiga nixĩ i ngẽma ore i ñaxũ, “Daxũwa naxũ”, ñaxũ? Rũ dũcax, ngẽmawa nũxũ tacuax ga noxri rũ ñoma ga naãnegu na ínaxĩxũ ga nũmax. ¹⁰Rũ gumatama Cristu ga ñoma ga naãnegu írũxĩcũ, rũ gumatama nixĩ ga daxũgũxũ i naãne i Tupana íngẽxmaxũwa ñxcũ na guxãëtũwama nangẽxmaxũçax rũ guxũwama nangẽxmaxũçax. ¹¹Rũ nũmatama nixĩ ga guxema norũ duũxẽgũna naxããxũ ga tũmaãrũ cuax rũ tũmaãrũ puracũ. Rũ tũxũ naxuneta ga ñuxre na toxnamana tũxũ namugũxũçax na yẽma tanaxũxũçax ga norũ puracũ. Rũ tũxũ naxuneta ga toguãx na tanangõxëëxũçax ga norũ ore. Rũ tũxũ naxuneta ga toguãx na togũmaã nũxũ tixuxũçax ga yema norũ ore. Rũ tũxũ naxuneta ga toguãx na yema yaxõgũxũãrũ dauruũ na tixĩgũxũçax. Rũ tũxũ naxuneta ga toguãx na duũxũgũxũ tangũxëëxũçax ga norũ ore. ¹²Rũ yemaãcũ norũ duũxẽgũna nanaxã ga tũmaãrũ puracũ rũ tũmamaã ínanangũxũxëë na ngẽma yaxõgũxũxũ tarũngũxëëgũxũçax na ngẽmaãcũ guxũma i ngẽma yaxõgũxũ rũ yexeraãcũ nũxũ yacuãetanũxũçax i norũ ore. ¹³Rũ Cristu nanaxwaxe na ngẽma norũ orewa íyaetanũxũ i guxãma i yixema ñuxmatáta wũxigu aixcũma meã yaxõgũ rũ meã nũxũ icuaxgũ ya Tupana Nane. Rũ ngẽmaãcũ tá dũxwa nawa tangugũ na aixcũma Tupana naxwaxexũãcũma

ixīgūxũ, rü tá tiyaetanü i norü orewa ñuxmatáta ñoma Cristu ya aixcúma mexêchicürüũ ixīgü. ¹⁴Rü täütáma ñoma buxīgürüũ tixīgü i tórü maxűwa. Erü ngêma buxīgü rü tauxchaacü toguama narűxĩnű. Rü ngêxguma tacü rü to i nguxêetaexũ naxĩnűegu rü ngêma we narűxĩ ñuxmata naga naxĩnű i ngêma duűxűgü i chixexũ i norü doramañ nawoműxêegűxũ rü nachixexêegűchaűxũ. Natürü i yixema rü tama name na ngêxgumarüũ ixīgűxũ. ¹⁵Rü name nixĩ i yigü ingechaűgűacúma nagu taxĩ i ngêma ore i aixcúma ixĩxũ, na ngêmaacü yexeraacü naxrűũ ixīgűxűcax ya Cristu ya guxűma i yaxögűxűärü ägəxgacü ixĩcũ. ¹⁶Rü taeru ya Cristuwa nixĩ i ne naxűxũ i tórü pora na naxcax imaxêxűcax. Rü guxăma i yixema rü wűxigu naxmexwa tangêxmagü. Rü ngêxguma Cristugagu meă wűxigu ipuracűegu rü yigü rűngűxêegü rü guxűma meăma inixũ. Rü ngêmaacü yigü ingechaűgűacúma norü orewa tiyaetanü na dűxwa nűma nanaxwaxexűacúma ixīgűxűcax.

**Maxű i ngexwacaxűxũ i Cristugagu
tűxű ngêxmaxű**

¹⁷Rü ñuxma rü Cristuégagu pexű chaxucuxê na tama nagu pexĩxũ i ngêma chixexũ ga noxri nagu pexĩxũ ga yexguma tauta Cristuaxű peyaxögűgu. Rü tama name i nagu pexĩ i nacűmagü i ngêma duűxűgü i tama Tupanaxű cuaxgűxũ i naêchitamare maxêxũ. ¹⁸Erü Chataná rü nanatoöegü i ngêma duűxűgü, rü ngêmacax chixexűguxicatama narűxĩnű. Rü nagagugűtama nűxű nataxuma i maxű i

taguma gűxű i Tupanawa ne ũxű, erü tama nűxű nacuaxgűchaű. ¹⁹Rü tama naxăneê na tacü rü chixexũ na naxűgűxũ, rü ngêmacax nagu naxĩ rü nűxű namepua i guxűraűxũ i chixexűgü na naxűgűxũ. ²⁰Natürü i pema rü tama ngêmaacü na pemaxêxűcax nixĩ i Cristuaxű peyaxögűxũ. ²¹Yerü pema rü marü meă nűxű pexĩnű ga Cristuchiga. Rü toxűtawa naxcax pengűe, rü nűxű pecuax i norü ore i aixcúma ixĩxũ na ñuxăcü Ngechuchu naxwaxexűacúma na pemaxêxũ. ²²Rü ngêmacax name nixĩ i nűxű perűxoe i ngêma nuxcűmaűxũ i pecűmagü ga ũpa nagu pexĩxũ. Yerü yema nuxcűmaűxũ ga perü maxű rü nachixexűchi. Rü pexű napora rü pexű nawoműxêegü na nagu pexĩxűcax ga yema pexeneărü ngűchaűgü i tama mexű. Natürü i ñuxma rü name nixĩ i nűxű perűxoe i guxűma i ngêma. ²³Rü ngêmacax i ñuxma na Cristuarü duűxűgü pixīgűxũ rü name nixĩ na Tupanaguxicatama perűxĩnűxũ. Rü name nixĩ i Tupanana pegű pexăgü na Naăe i Ũinexű pewa puracűxűcax rü na nangexwacaxűxêêaxűcax i peăe. ²⁴Rü name nixĩ i penayaxu i ngexwacaxűxũ i pecűma i Tupana norü ngűchaűmaă pexcax mexêxũ. Rü ngêma nacűma i ngexwacaxűxũ rü perü maxű i mexűwa tá nangox i ngêxguma nagu pexĩxgu i ngêma ore i aixcúma ixĩxũ rü tama nawe perűxĩxgu i pexeneărü ngűchaű. ²⁵Rü ngêmacax i ñuxma na Cristuarü pixīgűxũ rü tama name na pidorataaxgűxũ. Natürü name nixĩ i wűxichigü rü tűmaműcűmaă aixcűmaxű tixu. Erü guxăma i yixema rü yigűtanűxũ i yaxögűxũ tixīgü. ²⁶Rü

ngëxguma texé tacü peãewa nguxëëgu rü ipegüna pedaugü na tama pecadu pexüxüçax! Rü tama name i nagu perüxinüëëcha natürü name nixĩ i paxa ngëmatama i ngunexügu nüxü ipeyarüngüma i ngëma naxüpa na yanaxücuxü ya üaxcü. ²⁷Rü pegüna pedaugü na tama penaxüchicaxüçax i Chataná na ngëmaäcü nayoxniëxüçax rü pemaã inacuáxüçax. ²⁸Rü ngëxguma texé petanüwa ngítaaxgu ga üpa, rü name nixĩ i nüxü tarüxo i ngëma. Rü name nixĩ i tümamexëmaã meã tapuracü na ngëmaäcü tüxü nangëxmaxüçax i tümäärü ngëmaxü na toguax ya tüxü nataxúemaã tangauxüçax. ²⁹Rü tama name i chixexü i oremaã pidexagü. Natürü name nixĩ i ore i mexümaã pidexagü na ngëmaäcü ngëma duüxügü i pexü ñnüëxüxü perüngüxëëgüxüçax na yexeraäcü Tupanaga naxñnüëxüçax rü nataãëgüxüçax. ³⁰iRü pexuãëgü na tama penangechaüxëëxüçax i Tupanaãë i Üünexü! Erü ngëma Naãë i Üünexü nixĩ i Tupana pexna muxü na nüxü pecuáxüçax na aixcüma norü duüxügü pixīgüxü ñuxmatáta ngëma ngunexü i nagu pexçax núma naxüxü ya Cristu. ³¹iRü nüxü perüxoe na nagu perüxinüëëchaxü ega texé tacü rü chixexü pemaã üxgux! Rü ngëxgumarüü ta name nixĩ na nüxü perüxoexü na aigu perüxinüëëxü, rü exna penuëxü, rü exna pegü na pengaxü, rü exna peguxchigawaxegüxü. Rü ngëmaäcü name nixĩ na nüxü perüxoexü i guxüma i ngëma chixexü i dexagü. ³²Rü name nixĩ i pegü perüngüxëëgü rü pegümaã pemecümagü, rü pegüxü

pengechaütümüügü i wüxichigü. Rü ngëxguma petanüwa texé tacü rü chixexü pemaã üxgux, rü name nixĩ i pegüxü nüxü pengechaügü i wüxichigü yema na Cristugagu Tupana pexü nüxü nangechaüxüü.

Name nixĩ i meã namaxë i Tupanaxäcügü

5 ¹Rü ñuxma rü Tupanaxäcügü ya pexü nangechaügüxe pixīgü. Rü ngëmacax name nixĩ i naxçax pedau na naxrüü meã pemaxëxü rü naxrüü pimexü. ²Rü name nixĩ i pegü pengechaügü yema Cristu tüxü na ngechaüxüü. Rü nüma rü taxçax nügü inaxã rü taxçax nayu. Rü yemaäcü Tupanaxü nataãëxë yerü yemaäcü tüxü namaxëxë. ³Rü ñuxma rü Tupanaärü duüxügü pixīgü. Rü ngëmacax tama name i naĩ i ngemaã rü exna naĩ ya yatümaã na ipepexü. Rü tama name na pexeneärü ngúchaüwe perüxüxü rü exna pegüna penanugüchaüxü i tacü i ngëmaxügü. Rü ngëmacax name nixĩ i nüxü perüxoe i guxüma i ngëma chixexügü, rü bai i nachiga na pidexagümarexü. ⁴Rü tama name i tacü rü ore i ãüächixüxü pixu, rü bai i tacü rü ngeãëxümare pixu, rü bai i texéxü pecugücüraxü. Erü ngëma ore i chixexügü rü taxuwama name. Rü narümemae nixĩ i Tupanana moxë pexägü. ⁵Rü aixcüma pemaã nüxü chixu rü ngëxguma texé naĩ i ngemaã rü exna naĩ ya yatümaã ipexgu, rü exna tümaxünearü ngúchaü taxüxgu, rü taxucürüwama taxächica i ngextá tóru Cori ya Cristu rü Tanatü ya Tupana äëxgacü fixüüwa. Rü ngëxgumarüü ta taxucürüwama texé ngëma taxächica

ega tūgūna tananugūchaũxgu i tacū rū ngēmamaxgū. Erū yíxema ngēma nacūma tūxū ngēmamaxē rū dūxwa namaā tatupanaāx i ngēma nacūma i chixexū. 6iRū tama naga pexínüē ega texé tacū rū ore i ngēāēmarexūmaā pexū womūxēēchaũgu na penaxūxūcax i ngēma chixexūgū! Erū ngēma chixexūgūgagu nixī i Tupana tá poraācū napoxcuexū i ngēma duūxūgū i tama naga ĩnūēxū. 7Rū ngēmacax tama name i ngēma duūxūgūmaā pexāmücūgū na pema rū ta tama penaxūxūcax i ngēma chixexūgū. 8Rū ũpa ga pema rū ēānexūwa peyexmagū, yerū tama Tupanaxū pecuax rū chixri pemaxē. Natürü i ñuxma na Tupanaxū pecuáxū rū tórü Coriarü duūxūgū na pixīgūxū, rū ngóonexūwa pengēxmagū. Rū ngēmacax name nixī i duūxūgū i ngóonexūwa ngēxmagūxūrüü meā na pemaxēxū. 9Erū ngēxguma ngóonexūwa ingēxmagu, rū mexū taxūgū, rū nagu taxī i ore i aixcūma ixīxū, rū meā tamaxē. 10Rū ngēmacax name nixī i naxcax pedau na nagu pexīxū i ngēma maxū i tórü Cori namaā taāēxū. 11Rū tama name i pema rū ta penaxū i ngēma chixexūgū i taxuwama mexū i ngēma togū i duūxūgū i ēānexūwa ngēxmagūxū ũgūxū. Natürü narūmemaē nixī i penangoxēē na nachixexū i ngēma naxūgūxū. 12Erū ngēma chixexū i cūācūma naxūgūxū i ngēma yatūgū rū ngexūgū, rū woo nachiga idexagūmaregu rū wūxi i ānexūchi nixī. 13Natürü ngēxguma ngóonexūwa nangēxmagu i tacū rū chixexūgū rū meā tá nangox na ñuxācū nachixexū. 14Erū guxūma i tacū i ngēxmaxū, rū

ngēxguma ngóonexūwa nangēxmagu, rū meāma nangox na ñuxācū yīxū. Rū ngēmacax i Tupanaārü orewa rū ñanagürü:

“iNabaixāchi i cuma na cupexū! iRū ĩrūda i cuma na icuyarūtaxuxū! iRū nagu rūxīnū na ñuxācū nachixexū i ngēma curū pecadugū! Rū Cristu tá cuxcax nanangóonexēē rū tá cuxū narūngūxēē na Tupanaxū cucuáxūcax”,

ñanagürü i ngēma orewa. 15Rū ngēmacax name nixī i pexuāēgū rū meā pemaxē. Rū tama name i ngēma duūxūgū i tama Tupanaārü orexū cuaxgūxūrüüācūma na pemaxēxū, natürü penaxwaxe na duūxūgū i meā Tupanaga ĩnūēxūrüü meā na pemaxēxū. 16Rū ñuxma na Tupana pexū yatauxchaāchixēēxū rū ipexaxaāēgū na nūxū pepuracūexū rū penaxūxū i ngēma nūma nanaxwaxexū! Erū ñomaūcūü i duūxūgū rū poraācū chixexū naxūgū. 17Rū ñuxma na ngēmaācū namaxēxū i togū i duūxūgū, rū tama name na naxrūü pixīgūxū. Rū tama penaxwaxe i duūxūgū i ngēāēmarexūrüü pixīgū. Natürü name nixī i Tupanaārü orewa pengūe na nūxū pecuáxūcax i tacū na yīxū i tórü Cori pexū naxwaxexū na penaxūxū. 18Rū tama name i tacū rū axexū i ngūchixāxūmaā pengāxē, erū ngēma rū chixexū tūxū naxūxēē i ngēxguma ngēmaācū imaxēgu. Natürü name nixī i Tupanaāē i Ūñexūna pegū pexāgū na pewa nangēxmaxūcax rū pemaā inacuáxūcax. 19Rū name nixī i Tupanaārü orechigagu rū norü wiyaegūgu pegūmaā pidexagū rū

pegūmaā nūxū pixu. Rū name nixī i nagúxūraūxū i norū wiyaegūgu pewiyaegū, na ngēmaācū guxūne ya perū maxūnemaā tórū Corixū picuāxūūgūxūcax. ²⁰Rū name nixī i guxūguma tórū Cori ya Ngechuchu ya Cristuégagu moxē nūxna pexāgū ya Tanatū ya Tupana naxcax i guxūma.

Ñuxācū meā nūgūmaā namaxē i wūxi ya ipatacūāx i Cristuaxū yaxōgūxū

²¹Rū ñuxma na Cristumexēwa pengēxmagūxū, rū name nixī i pegūga pexīnūē i wūxichigū, erū Cristuxū pengechaūgū rū naga pexīnūē. ²²Rū pemax, Pa Ngexūgūx, rū ngēma tórū Cori naxwaxexūrū rū name nixī na petega pexīnūēxū. ²³Erū nūma ya yatū rū namāxēru nixī, ngēxgumarū rū ya Cristu na guxūma i yaxōgūxūēru na yīxū. Rū nūmagū i yaxōgūxū rū Cristuxūne nixīgū rū nūma ya Cristu nixī i norū maxēēēru yīxū. ²⁴Rū ngēxgumarū rū na Cristuga naxīnūēxū i ngēma yaxōgūxū, rū ngēxgumarū tā i ngexūgū rū name nixī na guxūguma natega naxīnūēxū. ²⁵Rū name nixī i namāxū nangechaū ya yatū, yema Cristu guxāma ga yaxōgūxexū na nangechaūxūrū. Rū yema na tūxū nangechaūxūcax nixī ga nayuxū ga Cristu. ²⁶Rū yemaācū nanaxū ga Cristu na nūgūxū tūxū yadexechixūcax rū tūxū yaxūnēxēxūcax i guxāma i yixema na yaxōgūxū. Rū norū oremaā rū ngēma dexā i nawa íbaiūxūmaā tūxū nimexēē na aixcūma napexewa imexūcax. ²⁷Rū yemaācū tūxū nimexēē na nūgūtama tūxū nawéxūcax na aixcūma guxūwama imexū rū na nataxuxūma i tacū i tórū

chixexū rū bai i írartūwa i ngēxguma napexewa ingugūgu. Erū tūxū nidexechi na ixūnēgūxūcax rū guxūwama imexūcax i napexewa. ²⁸Rū yema Cristu tūxū na ngechaūxūrū, rū wūxichigū ya yatū rū nanaxwaxe na namāxū nangechaūxū ñoma nūgūxūnēxū na nangechaūxūrūtama. Rū yixema tūmamāxū ngechaūxē rū tūgūtama nixī i tangechaūxū. ²⁹Erū tataxuma ya texē ya tūmaxūnechitama aixe, natūrū tanaxūwemū rū meāma nūxna tadau ngēma Cristu guxūma i yaxōgūxūna dauxūrū. ³⁰Rū guxāma i yixema na yaxōgūxū rū Cristuna taxīgū rū ngēmaācū naxūne tixīgū. Rū nūma tūxna nadau. ³¹Rū ngēmacax i Tupanaārū ore i ūmatūxūwa rū ñanagūrū:

“Rū wūxichigū ya yatū rū nanatūna rū naēna tá nixūgachi na namāxmaā inaxāūxūcax. Rū ngēma taxre rū wūxi tátama nixīgū”,

ñanagūrū i ngēma ore. ³²Rū ngēma ore i yatūchiga rū namāxchiga rū wūxi i ore i aixcūma mexū nixī. Natūrū ñuxma na pemaā nūxū chixuxū i ngēma rū Cristuchiga rū yaxōgūxūchiga nixī i chidexaxū. ³³Natūrū ngēma ore rū pechiga ta nixī. Rū ngēmacax i wūxichigū i pema i yatūgū rū name nixī i pemaā na pengechaūxū ngēma pegūtama na pengechaūxūrū. Rū ngēxgumarū tā i pema i ngexūgū rū penaxwaxe i petega pexīnūē.

6 ¹Pa Buxūgūx, ñuxma na Cristuarū pixīgūxū, rū name nixī i penatūga rū peega pexīnūē, erū ngēma nixī i aixcūma mexū. ²⁻³Yerū yema mugū ga

Tupana Moichéna āxūtānuwa rü yema mu ga nüxīra wüxi ga unetamaā Tupana nüxū ixuxū, rü ñanagürü:

“iRü tüxū nangechaū rü tüxū
rüngūxēē ya cunatū rü cue na
aixcūma cutaāēxūcax rü
namáxūcax i curū maxū i ñoma
i naānewa!”

ñanagürü. ⁴Rü pemax, Pa Papagü rü Pa Mamagüx, rü tama name i penangamare rü penanuēxēē i pexacügü. Rü name nixī i meā penayaexēē, rü peyaxucuxēgü rü penangúexēē na meā tórü Coriaxū yaxögüāxūcax. ⁵Rü pemagü, Pa Duūxügü ya Ixāārü Coriāxgüe, rü name nixī i meā naga pexīnūē i perü corigü i ñoma i naānewa. Rü penaxwaxe i nüxū pengechaügüācūma rü nüxū pemuūēācūma meā naga pexīnūē ñoma Cristuaxū pepuracüexürü. ⁶Rü tama name ega perü corigü pexū dawenüguxicatama meā nüxū pepuracüē na ngēmaācū pemaā nataāēxūcax. Natürü ñuxma na Cristuarü duūxügü pixīgüxū, rü name nixī i guxūma i perü ngūchaūmaā penaxü i ngēma Tupana pexū naxwaxexū. ⁷Rü ngēma puracü i perü cori pexna āxū, rü name nixī i petaāēācūma penaxü, ñoma tórü Cori ya Ngechuchuaxū pepuracüexürü. Erü aixcūma nüxū nixī i pepuracüexū rü tama i duūxügüaxū. ⁸Rü name nixī i ngēmaācū meā pepuracüē, erü nüxū pecuax rü wüxichigü i duūxū rü woo wüxi i coriarü duūxū yixīgu rü exna taxúxearü yixīgu, natürü tórü Cori ya Ngechuchu tá nüxū nanaxūtānū naxcax i ngēma mexū i naxūxū. ⁹Rü pemax, Pa Corigüx, rü name nixī i ngēxgumarü ta

meā namaā pemaxē i perü duūxügü. Rü tama name i tacü rü chixexūmaā penaxāūxūne. Rü nüxna pecuaxāchie na pema rü ta perü duūxügürü tórü Cori ya daxügucümexēwa na pengēxmagüxū. Rü aixcūma guxāma i yixema rü tawüxigu i napexewa ya tórü Cori ya Cristu.

**Cristuarü duūxügüarü poxürü i Tupana
nüxna āxū na nügü namaā
ínapoxügüxūcax naxchaxwa i Chataná**

¹⁰Rü ñuxma Pa Chaueneēgüx, rü name nixī i penayaxu i tórü Coriarü pora na namaā peporaexūcax. Erü nūma rü naporaxūchima rü ngēmacax nüxū natauxcha na pexū naporaexēēxūcax. ¹¹Rü name nixī i penayaxu i guxūma i perü poxürü i Tupana pexna āxū na ngēmaācū pegü ípepoxūxūcax rü aixcūma peporaexūcax i ngēxguma Chataná pexū womūxēēchaūgu. ¹²Erü tama duūxügü i taxrū āmachixū rü āxchinaxāxūmaā nixī i yigü idaixū. Natürü ngēma namaā yigü idaixū nixī i Chatanáarü duūxügü i ngoxogü i chixexügü i poraexū. Rü nūmagü rü namuxūchi rü tüxū narüporamaēgüchaū. Rü tama nüxū tadaugü erü naāēgü nixī, natürü guxūwama nangēxmagü i ñoma i naānewa. Rü namaā inacuax i ñoma i naāne i chixexū. ¹³Rü ngēmacax name nixī i penayauxgü i guxūma i ngēma perü poxürü i Tupana pexna āxū, na ngēmaācū pegü ípepoxūxūcax rü nüxū perüyexeraxūcax i ngēxguma ngēma naāēgü i chixexū pexū rüporamaēchaūgu. Rü ngēmaācū tāūtāma nüxū penguxū i ngēxguma

ngêma naãëgü i chixexũ pexũ rüyexerachaũgu. ¹⁴Pema nüxũ pecuax rü ngëxguma nügü nadaixchaũgu i churaragü rü nagúxũraũxũ i norü poxũruũ nügü naxügu na tama norü uwanügu nüxũ rüporamaëgüxũcax. Rü pema penaxwaxe na Tupanaãrü churaragü i mexũ na pixĩgüxũ. Rü ngëmacax name nixĩ i penayauxgü i guxũma i ngëma poxũruũ i Tupana pexna äxũ. Rü wüxi i churara rü nügü nanaxü i norü goyexũ i tachipanüxũ na ngëmamaã nügü ínapoxũxũcax i napütüwewa. Rü ngëxgumarüũ ta i pema rü penaxwaxe na ngëma ore i aixcüma ixĩũgu pexĩxũ na ngëmaäcü pegü ípexoxũxũcax nawa i chixexũgü. Rü wüxi i churara rü nayangaxcuchi i naremüärü poxũruũ na ngëmaäcü nügü ínapoxũxũcax. Rü ngëxgumarüũ ta i pema rü penaxwaxe na pexũ nangëxmaxũ i perü maxũ i aixcüma Tupanapexewa mexũ na ngëmaäcü pegü ípexoxũxũcax nawa i chixexũgü. ¹⁵Rü wüxi i churara rü nicuaixcuchi i norü chapatu na nüxũ natauxchaxũcax na iyaxũxũ. Rü ngëxgumarüũ ta i pema rü penaxwaxe na meã ípememarexũ na ípexĩächixũ na nüxũ pixuxũ i ngëma ore i mexũ i Tupanamaã tüxũ rüngüxmüëxëxũ rü tüxũ taãëxëxũ. ¹⁶Rü wüxi i churara rü nügüchacüüwa nayaxücuchi i norü poxũruũ i ätachinüxũ i namaã nügü ínapoxũxũ. Rü ngëxgumarüũ ta i pema rü penaxwaxe na aixcüma Cristuaxũ peyaxögüxũ na ngëmaäcü pegü ípexoxũxũcax nüxna i Chatanáne i äñcümaxũ i namaã tüxũ nachixexëëchaũxũ. ¹⁷Rü wüxi i churara rü nüxũ nangëxma i napatexe i norü

poxũruũ i naëruwa. Rü ngëxgumarüũ ta i pema rü penaxwaxe na pexũ nangëxmaxũcax i perü maxũ i taguma gúxũ na ngëmamaã pegü ípexoxũxũcax. Rü penaxwaxe i pexũ nangëxma i ngëma pexne i wüxi i tararüũ ixĩxũ. Rü ngëma pexne nixĩ i Tupanaãrü ore i mexũ i Naãë i Üünexũ pexna äxũ. ¹⁸Rü tama name i nüxũ perüchae na peyumüxëgüxũ. Natürü name nixĩ i guxũguma Tupanaãë i Üünexũärü ngüxëëmaã Tupanaxũ pecaaxũ rü guxũraũäcü peyumüxëgü. Rü name nixĩ i pexuãëgü na guxũguma ngëmaäcü peyumüxëgüxũ rü taguma nüxũ perüxoexũ. Rü penaxwaxe i tümacax peyumüxëgü ya guxäma ya texé ya Tupanaãrü duũxügü ixĩgüxe. ¹⁹Rü ngëxgumarüũ ta chanaxwaxe na chauxcax peyumüxëgüxũ na Tupana choxũ rüngüxëëxũcax rü choxna naxäãxũcax i ngëma ore i nüma nanaxwaxexũ na nüxũ chixuxũ. Rü chanaxwaxe i Tupanana naxcax peca na choxũ naporaxëëxũcax na tama chamuũäcüma meäma nüxũ chixuxũcax i norü ore i mexũ ga noxri duũxügü tama nüxũ cuáxũ i Cristuchiga. ²⁰Rü ngëma orexũ na chixuxũcax nixĩ ga Tupana nügüchicüü choxũ namuxũ, rü ngëmacax nixĩ i chapoxcuxũ i ñuxmax. Rü chanaxwaxe i chauxcax peyumüxëgü na tama chamuũäcüma meäma nüma nanaxwaxexũäcüma nüxũ chixuxũcax i ngëma norü ore.

Pauru nanaguxëë ga norü popera rü wenaxärü yema duũxügüxũ narümoxe

²¹Rü taeneë ya nüxũ ingechaücü ya Tíquicu, rü chauxrüũ aixcüma meäma

napuracü i tórü Coriarü puracüwa. Rü nüma tá pemaã nüxũ nixu i chauchiga rü guxũma i ñuxãcü choxũ na naxüpetüxũ i nuã. ²²Rü ngëmacax nixĩ i pexütawa chanamuxũ, na pemaã nüxũ yaxuxũcax na ñuxãcü toxũ naxüpetüxũ, na ngëmaãcü pexũ nataãëxëxũcax.

²³Pa Toeneëgü i Yaxögüxũx, chanaxwaxe i Tanatü ya Tupana rü tórü Cori ya Ngechuchu ya Cristu pexũ narü-ngũxëëgü i guxãma i pema na meã

pegümaã pemaxëxũcax, rü aixcüma petaãëgüxũcax, rü pegü pengechaũgüxũcax rü meã peyaxögüxũcax. ²⁴Rü chanaxwaxe i Tanatü ya Tupana nüxũ narüngũxëë i guxũma i ngëma duũxũgü i aixcümaxũchi tórü Cori ya Ngechuchu ya Cristuxũ ngechaũgüxũ. Rü ngëmaãcü yĩ.

*Rü nuãma pexna,
Pauru*